



03.09.2024

UKA2024/106

Inatsisartut suleriaasianni § 36 malillugu, matumuuna oqallinnissamik siunnersuut aallaavigalugu apeqquteqarpunga.

Meeqqat atuarfiini atuartunut ilinniartitsisunullu atugarissaarneq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Mette Arqe-Hammeken, Naleraq)

Meeqqat atuarfianni ilinniartitsisutut sulininni ilinniartitsisoqaterpassuakkalu akulikillingaluttuinnartumik nalaattarparput meeqqat pissusaat unaminarsiertortut, taamaalilluni atuartitsinerup pilersaarutaasumik ingerlanissaralua pinngitsoortarluni. Meeqqat pissusaat ilaatigut sakkortoorujussuusarput, akunnerminni qinngasaarunnerit meerarpassuillu iluamik sinissimanatik atuariatortartut arlaqarlutik aamma nerisimanatik ilaatigullu atuagaasiveqaratik imaluunniit atuakkanik ilannakortunik nassataqartarlutik.

HBSC misissuinerimi kingullermi (Meeqqat atuartut peqqissusaannik, atugarissaarnerannik misissuititsineq) Kalaallit Nunaanni ilaatigut takutinneqarpoq siulianit misissuisimanermit qinngasaarisarneq qaffariarsimasoq kiisalu meeqqat kiserliortut kisitsisitigut qaffasissorujussuarmik inissisimasut, affaasa apersorneqartut piffissap ilaatigut piffissamiluunniit sivilunerpaami kiserliortuusut.¹

Meeqqanut, inuusuttunut ilaqutariinnullu suliniutit pitsaasorpasuit ingerlanneqartarput pinaversaartitsinerlut peqqinnerulernissamillu siuarsaataasunik ingerlanneqartartunik, pingaartumik sunngiffimmi kiisalu inoqutigiit akornanni ilaqutariinni sannginnerusuni suliniutit ilaallutik.

Meeqqalli atuarfianni pissutsit ulloq manna tikillugu isigissagaanni soorlu pineqartoq iluamik isumagineqaanngitsoq.

Ilinniartitsisutut sianissutsikkut timikkullu artornartorujussuuvoq ullut tamarluinnaasa meeqqanit sakkortuumik pissusilersorfigineqarlunilu akerartugaasarneq. Suliffeqarfimmi timikkut tarnikkullu persuttagaaneq akuerineqanngilaq ingerlaannartumillu tamanna aqqusaarneqarsimatillugu qanoq iliuuseqarfigineqartarluni. Meeqqat ajortuuniarlutik kissaatigineq ajorpaat qularnanngitsumilliuna ikioqqullutik nilliasartut. Atuarfimmi ilinniartitsisut, atuartitsinissamik pisussaaffiup saniatigut meeqqat pitsaasumik piginnaasaasa ineriartornissaat annertuumik kissaatigisarlugu atuartitsisutini assigiinngitsuni ingerlattarpaat, kisianni klassemi eqqissisimatitsiniarneq taama annertutigisunik unaminartoqartillugu arlalitsigut pakatsimalluni nikallungalunilu ingerlaffiusarpoq. Ajournerpaaffianilu uippakajaalernermik kinguneqartarluni aamma atuarfimmi ilinniartitsisup napparsimalerneranik kinguneqartarluni.

¹ https://www.sdu.dk/da/sif/rapporter/2024/skoleboernsundersoegelsen_i_groenland_2022

Naleqqamiit isumaqarpunga meeqqat atuarfimmilu ilinniartitsisut pissutsini taamaattuniitiinnarnissaat tulluanngitsoq, taamaattumillu atuartunut atuarfimmilu ilinniartitsunut pissutsit oqallisigissagivut kissaatigaara.

Atuartummi ilinniartitsisullu akornanni ingerlalluarneq atuartumut atuariartornissamut piumanerulersitsisartoq qularutiginnilara, taamalillunilu aamma atuarfimmi ilinniartitsisunik peqaannarnissamut oqinnerulersitsisaruni.

Tamanna qulequtaq aallaavigalugu oqallilluarnissamik kissaassivunga.